



Bentiaraq Ottosen

UPA 2026/142-1

Atassut

12. Maj 2026

**Nunami aalisakkerivinni innaallagissamut, imermullu akikillileruteqartitseriaatsip atuuttup aallarnisaasunut, suliffeqarfinnullu mikinerusunut atuutsilersinneqarneratigut aningaasatigut, allaffissornikkullu kingunissaanik erseqqissaasumik nalunaarusiornissaanik, Naalakkersuisut peqquneqarnissaanik Inatsisartut aalajangiiffigisassaattut siunnersuut. Nassuiaat aningaasalersueriaatsinik, Inatsisartullu aalajangiinissamut tunngavissaanik ataatsimoortumik imaqassaaq. Nassuiaat kingusinnerpaamik 1. januar 2027-mi Inatsisartunut agguanneqassaaq.**

(Inatsisartunut ilaasortaq Napaartoq Isak Petrussen, Demokraatit)

Atassutip politikkaa naapertorlugu inuusutissarsionermik ingerlataqartut suliffeqarfiit namminersortut tapersorneqarnissaat pingaartuuvoq. Atassut isumaqarpoq suliffeqarfiit namminersortut mikinerusut aamma suliffeqarfinnik aallarnissaasut Kalaallit Nunaanni ineriartortitsinermi pingaaruteqarluinnartuusut, taamaattumik ingerlatsinermut aningaasartuutit appartinneqarpata iluaqutaasinnaasoq oqariartuutigalugu, kisiannili apeqqut pitsaasuusaaq qaqlissallugu inuiaqatigiit akiligaanik akinik apparsaajuartilluta suna tamaat unammilleruminaalligaluttuinnassaaq – saniatigummi aningaasatigut akeqartussaammata inuiaqatigiinnut.

Kalaallit Nunaanni suliffeqarfinnut namminersortunut ajornartorsiutit ilagilluinnarpaat, akit atugassarititaasut qaffasissinnaammata. Kisiat eqqarsaatigisariaqarparput imermut akiliutigisartagarput nunarsuarmioqatitsinniit annikinneerarsuuvoq. Assartuussinermut aningaasartuutit qaffasipput, takuneqarsinnaammammi suliffeqarfiit angisuut nunatsinni aaqqissorsimavagut kisermaasisussanngorlugit. Tamakkua aaqpinneqaaqqaartinnagit unammillernartoq qaffasittuaanassaaq, taamaattumik Atassummiit unammilleqatigiineq ineriartortinneqartariaqartoq oqariartuutigaarput, suliffeqarfiit namminersortut aningaasarsionermikkut pitsanngoraluttuinnassammata.

Pingaartumik inoqarfinni minnerni isorliunerusunilu taaneqartartuni pissutsit qiviarneqarsinnaapput, unammillernartut annertuut inuiaqatigiinni atorneqarput. Inoqarfinni annerni unammillersinnaassuseq annertuneruvoq taamaattumik oqimaaqqatigiissumik ingerlatsisoqarsinnaanera oqallisigineqarsinnaalluarpoq.

Atassummiit maluginiakkatta annersaat tassaavoq aalisakkerivinnut immikkut akikilliliissutit pisortat suliffeqarfiitaani ingerlanneqartartut, soorlu innaallagissamut imermullu akiliutigineqartartut. Taamaattumik siunnersuutigineqartoq eqqarsaatigalugu Atassutip pitsaasutut isigaa suliffeqarfinnut pisortat pigisaannut atortinneqartut misissorluarnissaat, soorunalimi



pingaartuuvoq aamma suliffeqarfiit namminersortut periarfissaqalernissaat taamatut misissorneqarnissaa nikingassut qanoq annertutiginersoq paasineqarniassaaq.

Atassut nalignnaasumik isumaqarpoq namminersorlutik inuussutissarsiuteqartut pitsaasumik atugassaqartinneqartariaqartut, pisortat suliffeqarfinnik tamanik pilersitsisariaqanngimmata. Taamaattumik ingerlatsinermut aningaasartuutit appartinneqarsinnaappata namminersorlutik inuussutissarsiuteqartut amerlanerusut imminut napatissinnaanerulissapput.

Atassut pingaartippaa aningaasalersueriaatsip akisussaassuseqartumik ingerlanneqarnissaa, taamaattumik siunnersuummi piumasarineqartoq Naalakkersuisut nassuiaammik suliaqassasut tamanna taperserpaa, tassani aningaasatigut kingunerisassat aamma qanoq aningaasalersuisoqarsinnaanersoq nassuiarneqassammata. Atassut aningaasarsiornikkut mianersortumik ingerlatsinissamut politikikkut naapertuututut isigaa.

Allaffissornikkut apeqqutit pingaaruteqarput, massakkut tapiissuteqartarnerit imaluuniit immikkut akikilliliissutit pillugit suliffeqarfiit ilaatigut misigisarpaat qinnuteqaatit nalunaaruteqartarnerillu pisariullutik ingerlasut. Taamaattumik Atassutip isumaa naapertorutsigu aaqqissuusineq eqaanerusariaqarnera pingaartuuvoq aamma suliffeqarfinnut namminersortunut ingerlatsinikkut oqilisaataasariaqarmat allaffissornikkut oqimaangitsumik ingerlatsisoqarnissaa.

Politikkikkut siunnersuut tamaat isigalugu inuussutissarsiornikkut siuarsaanisaa pingaaruteqarpoq, aalisarnermik saniatigut inuussutissarsiornermik assigiinngisitaartitsineq eqqarsaatigalugu oqallisigineqartariaqartoq isumaqarpugut, aamma suliffeqarfiit namminersortut tassani pingaarutilerujussuummata. Innaallagissamut imermullu akit eqqarsaatigalugit periarfissanik amerlanerusunik pilersitsisinnaammata.

Atassut naatsorsuutigissavaaa aningaasalersueriaaseq erseqqissumik nassuiarneqassasoq aamma inuiaqatigiinnut aningaasatigut attanneqarsinnaanersoq uppernarsarneqassasoq, Naalakkersuisut allannguutissatut siunnersuutaat taperserparput.

Taama oqaaseqarluta Inuussutissarsiornermut aatsitassanullu ataatsimiititaliamut innersuullugu inassutigaarput.